



Inissialiornermut, illunut ataatsimoorussanut, illuliassanut il.il. tapersiissuteqartarneq pillugu Inatsisartut peqqussutaat nr. 11, 19. november 2007-imeersumi kapitali 4-ip allanngortinneqarnissaanik Naalakkersuisut sulissuteqaqqullugit peqquneqarnissaannik Inatsisartut aalajangiiffigisassaattut siunnersuut, taamaaliornikkut illuutit ataasiakkaat niuernermi naleqassusaannut naleqqussaasoqarnissaa qulakkeerneqarsinnaaqqullugu.
(Inatsisartunut ilaasortat, Knud Kristiansen og Gerhardt Petersen)
(Siullermeenera)

Demokraatini Atassut isumaqatigaarput – uggornarmat – uani BSU-p illuutaanik illoqarluni – illup nalinganut naleqqiullugu akiligassaqaernerulluni.

Paarlattuanilli neriuppunga, Atassutip Demokraatit isumaqatigissagai, illoqarfinni angisuuni nammineq pigisanik inissiaateqartoqarmat, inissiap nalinganut naleqqiullugu akiitsoqarfiunerusunik.

Kisianni tamakku pisortat akuliuffigisassarinnigilaat. BSU-p illuutaanik illutaarniarlutit imaluunniit nammineq pigisassannik inissiamik pisinissannut taarsigassarsisimaguit pisortat susassarinnigilaat aamma aningaaserivimmi imaluunniit Namminersorlutik Oqartussanit taarsigassarsisimaguit, tamanna illit qinigassarivat. Nammineq aalajangerputit tunisassamik pisiniarlutit. Taamaattumik illit nammineq akiitsuvit akilernissaat akisussaaffigivat.

Tamanna tunngavigalugu Demokraatini isumaqarpugut pisortat isumakkeerinnittussaannngitsut pisiap nalingata apparsimanera pissutigiinnarlugu.

Taamatulli oqareerluta Demokraatini isumaqarpugut, oqallisigisariaqaripput maannakkut napasut BSU-p illuutai nioqutigissallugit tulluurtuunersut. Nunarsuup sinnerani sanaartoriaatsit atortussallu misilerartuarneqarput. Assersuutigalugu glasfiberimik illuliat iglotut ilusillit oqorsaatit nutaaliaalluinnartut atorlugit oqorsakkat. Illut containerikut atorlugit illuliat. Illut issumik sanaat aamma illut biilit assakaasukui atorlugit sanaat. Illut ilaannakoortumik seqernup nukinga atorlugu aamma anorisaateeqqanik kiassarneqartut innaallagiamillu pilersorneqartut, tassani imikut salinneqartarlutik aamma. Taakku ilaat soorlu containerikut atorlugit illuliat aamma igloliat sanaajupput nuunneqarsinnaasunngorlugit, napparneqarsinnaasut isaterneqarsinnaasullu ilaqutariinni inoqutigiit allannguuteqaraangata.



Taakkununga naleqqiullugu BSU-p illuutai akisuupilussuupput, sanaartoruminaallutillu illuliornermut ilisimasaqartorsuungikkaanni, taamatullu aamma pisariupput attaveqarneq aserfallattaaliinerlu eqqarsaatigalugit. Aamma illup qanoq ittuunissaanut qanorlu atorneqarsinnaaneranut qangatut takorlueriaaseq atorlugu sanaajupput.

Paarlattuanik akikinnerusunik illuliorortoqarsinnaagaluarpoq, attaveqaatinut qilersorsimavallaanngitsunik nuunneqarsinnaasunillu.

Taamatut oqaaseqarluta siunnersuut itigartipparput.